

霞拱雲甍人神胥慶實大洞法師陸景平主其盟爲甚力嗟乎
事物之興機會之來必躋其人然亦有所待也瓊簷寶楯星月
相攢金卮玉墀雲霓爲御金碧精燦粉藻華鮮鱗礎千蟠暈楹
萬舞觚稜峭翠結綺流丹恍覩九光何殊三境儼爲華闕蔚慶
壯基幻玉清上清太清之規模奉天寶靈寶神寶之晨梵是宜
六龍宴駕九虎嚴闈鳳導鸞輪鸞駉羽乘錫爾戩穀貺我國家
此殿長甯與宋無極良由仙靈之所宅是以明聖之留神昔仙
翁葛孝先煉丹此地丹井猶存兩夕風朝時流丹現於皇聖朝
高真應世聖作明述衛教崇真非特奉禋祀是亦爲爾冠裳之
地也晨登陛檻日注帝真盍思所以報國家者乎無使曰朝帝
夕燭藐藐而已冲隱大司馬大同嗣陸景平之後憫往事之已
遠畏來者之弗知應相謂曰此殿旣成幾五十載屬臣爲記且
如天上成玉樓地下修文闕往昔人間士以爲記文今茲廟謨
所式當代盛事帝監不遠宜不得辭臣於是黽勉不逮弗思而
成但覺如操觚弄槧於蓋珠之上虛皇之前也

羅浮山慶雲記

淳熙改元十月旣望惠州守臣王甯奉天子命藏醮事於羅浮
山山卽十大洞天之一朱明曜真之府也先是唐天成中洞出
占劍迹其篆文已應太祖皇帝丁亥聖君之讖我宋受命時遣
中使奉金龍玉簡之典歲修國醮著在令甲孝宗皇帝始登大

寶爰致初敬是日也御香既上藏事薦成步虛升聞環佩作序
天容紺碧風日清美珍禽舞馴鹿悅仙花瑤草滿洞芳妍醮壇
之西北隅有五彩光華出焉上巨霄昊是謂卿雲輪囷郁麗華
景繽紛中有金龍徊翔翳鬱天人交慶寔應太平夫太平無象
也然而慶瑞大來亦於其人不少於其天天意以之昭格山川於
焉出雲雲物精禋猶登臺以課之建官以紀之秉筆以書之自
祥符初泰山慶雲現今焉復應猗歟盛哉河清嶽潤信有其時
廣東漕臣繪圖上之踰年有旨令禮部每遇郊恩給降祠牒以
度其年勞者使修香火永爲典故寶慶丁亥道士鄒思正該覃
恩霽州家檄之知冲虛觀事興懷休符命爲記文而繫之銘曰
太祖之潛龍也古劍出焉孝宗之飛龍也慶雲翔焉劍所以化
龍於地雲所以從龍於天易曰雲從龍風從虎聖人作而萬物
覩

道藏輯要

白真人集

四

聖

叟集四
x81

日用記

予年十有二卽知有方外之學已而學之偶得其說非曰生而
知之蓋亦有所遇焉後數年洞究其妙由是知三生之因緣達
四大之變滅漸不堪留意於其學矣自二十三歲以後似覺六
賊之兵浸盛三尸之火愈熾不復前日之身心太平也然幻緣
如此冷眼知之任其所爲縱其所欲蓋曰劫灰散後天地依然
業風淨時神性無恙虛生浪死如海中漚一罪一福隨心起滅